

**Uvodni govor Predsjedatelja Predsjedništva BiH, Nj.E. Željka Komšića na
REF JIE 20.11.2009**

Poštovana gospodo predsjednici,
Vaše ekscelencije,
dame i gospodo,
dragi prijatelji!

Imam izuzetno zadovoljstvo pozdraviti vas, danas u Sarajevu, na šestom sastanku Regionalnog ekonomskog foruma za Jugoistočnu Evropu.

Vaše prisustvo ovdje govori o našoj zajedničkoj želji za boljom regionalnom saradnjom, kako ekonomskom, tako i političkom, i to na principima partnerstva, razumijevanja, poštovanja i dobrosusjedstva.

Cijenim da je od izuzetnog značaja što su šefovi država, poslovni ljudi, predstavnici akademske zajednice iz cijelog regiona, spremni razgovarati, razmjenjivati mišljenja i stavove u jednom ovakvom okruženju, a sve u cilju iznalaženja rješenja iz teške ekonomske situacije uzrokovane globalnom ekonomskom krizom koja je pogodila i zemlje iz kojih dolazimo.

Naš zajednički cilj je da svi u regionu postanu dijelom velike euroatlantske porodice naroda. Današnji skup je doprinos unapređenju odnosa u regionu i jačanju regionalne saradnje, kao jednog od najbitnijih političkih preduslova spremnosti za nastavak puta ka evropskim integracijama.

Neke od država, čiji su predstavnici prisutni ovdje danas, članice su Evropske unije, neke imaju status kandidata ili potencijalnih kandidata. No svima nam je zajedničko da činimo sve što možemo da unaprijedimo naš region, jačajući vladavinu prava i funkcionisanje institucija koje omogućavaju efektivnu realizaciju preuzetih obaveza, te da na osnovu ekonomskih kriterija jačamo svoju konkurentnost na najzahtjevnijim tržištima, uključujući i Evropske uniju.

Kriteriji iz Kopenhagena zahtijevaju od kandidata za članstvo u EU vladavinu prava i funkcionisanje institucija, te sposobnost da očuvamo svoju konkurentnost i da se nosimo sa tržišnim silama unutar Evropske unije kad postanemo njeni članovi.

Upravo zbog toga, fokus naše pažnje danas bi trebali usmjeriti na konkurentnost zemalja Jugoistočne Evrope, za period 2009 – 2010, što nam može pomoći pri donošenju odluka u procesu oporavka od posljedica globalne ekonomske krize.

Dragi prijatelji,

želim iskoristiti ovu priliku i da istaknem važnost ovoga skupa za Bosnu i Hercegovinu, jer se moja zemlja nalazi pred više značajnih izazova.

Bosna i Hercegovina od 1. januara 2010. godine postaje nestalna članica Vijeća sigurnosti Ujedinjenih nacija.

Moja zemlja je predala aplikaciju za Akcioni plan za članstvo u NATO-u i nadamo se pozitivnom ishodu na predstojećem samitu šefova država članica NATO-a. Pozitivna ocjena naše aplikacije donijela bi dodatnu stabilnost i sigurnost ne samo Bosni i Hercegovini već i regionu, a stabilnost je toliko potrebna svima za poboljšanje ekonomske klime i privlačenje stranih investicija.

Također, polovinom sljedeće godine BiH će obilježiti dvije godine od potpisivanja Sporazuma o stabilizaciji i pridruživanju. Vjerujem da će i građani Bosne i Hercegovine tu godišnjicu dočekati sa mogućnošću slobodnog putovanja u zemlje Evropske unije, kao slobodni i jednakopravni građani Evrope.

Uvaženi učesnici šestog Regionalnog ekonomskog foruma za Jugoistočnu Evropu,

izražavajući još jednom zadovoljstvo što smo se ovom prilikom okupili u Sarajevu, u ime Predsjedništva BiH i moje lično, želim uspješan rad i upućujem najljepše želje svim prisutnim.

Hvala vam na pažnji.